

晉記卷六十

十六國錄

蕭山郭 倫撰

秦一

苻洪 苻健 苻生 苻堅 上

苻洪字廣世。略陽臨渭氏人也。其先蓋有扈之苗裔。世爲西戎酋長。始其家池中蒲生長五丈五節如竹形。時咸謂之蒲家。因以爲氏焉。父懷歸部落小帥。先是隴右大雨。百姓苦之。謠曰。雨若不止。洪水必起。因名曰洪。洪性好施。驍武善射。永嘉之亂。洪散千金。招豪傑之士。率宗人蒲光蒲突歸趙王劉曜於長安。拜

率義侯趙亡。洪西保隴山。石虎攻上邽。洪降。虎大悅。拜冠軍將軍。委以西方之事。累進龍驤將軍。爲流人。都督。處於枋頭。封西平郡公。其部下賜爵。關內侯者。二千人。以洪爲關內領侯將。冉閔以洪雄果。而諸子非常才。勸虎除之。虎待之彌厚。及石遵立。去洪都督。洪怒。乃遣使降晉。當是時。中原大亂。所在兵起。秦雍流民相率西歸。路由枋頭。其推洪爲主。洪遂有衆十餘萬。永和六年。穆帝加洪征北大將軍。都督河北諸軍事。冀州刺史。廣川郡公。洪以讖文有草付應王。其孫堅背文有草付字。又改姓苻氏。自稱大單于。仁秦。

王以雷弱兒爲輔國將軍、梁楞爲前將軍、魚遵爲後將軍、段陵爲左將軍、王墮爲右將軍、趙俱、牛夷、辛牢爲從事中郎、胡文爲博士、毛貴爲單于輔相。初，石虎以麻秋鎮枹罕，冉閔之亂，秋歸鄴。洪使子雄擊之，秋降於洪，以爲軍師將軍。秋說洪西都長安，洪深然之。旣而秋因宴鴆洪，欲并其衆。洪將死，謂子健曰：「吾所以未入關者，謂中州可指日而定也。不意今見困豎子，關中形勝，帝王之都也。吾死，汝兄弟速思入關，言終而卒。」年六十六，健卽誅秋。

健字建業，洪第三子也。母羌氏夢大熊而孕，及長，勇

果便弓馬好施石虎拜爲翊軍校尉鎮軍將軍洪卒健去秦王之號稱晉爵使使告喪於京師當是時京兆杜洪據長安稱晉征北將軍雍州刺史戎夏多歸之健密圖入關恐洪知之課所部種麥示無西意有知而不種者殺之以徇旣而悉衆西行起浮橋於盟津使弟雄率步騎五千入潼關兄子菁自軹關入河東健執菁手曰事若不捷汝死河北我死河南比及黃泉無相見也旣濟焚橋率衆繼雄後杜洪聞之使張先要健於潼關健逆擊破先進軍次赤水使雄略地渭北而修牋於洪獻名馬珍寶請至長安上尊號

洪曰。幣重言甘。誘我也。悉召關中兵拒之。健又敗張先於陰槃。擒之。盡陷諸城。時衆星夾河西流。占者以爲百姓還西之象。菁所至亦無不降者。三輔略定。健乃引兵向長安。洪奔司竹。健入長安。猶遣使獻捷。其軍師賈元碩表健爲侍中大都督。大單于。秦王。健怒曰。我之官爵輕重。非若等所知也。而陰使元碩等上尊號。遂以永和七年正月稱天王。大單于。赦境內死罪。建元皇始。繕宗廟社稷。立妻強氏爲后。子萇爲太子。弟雄爲丞相。領雍州刺史。分遣使者問民疾苦。搜羅儁異。寬重斂弛。離宮罷無用之器。去侈靡之服。凡

趙之苛政。不便於民者。皆除之。秦人大悅。初杜洪之奔也。招梁州刺史司馬勳。夏四月。勳率步騎三萬伐秦。健敗之於五丈原。

壬子八年春正月。健稱皇帝。追尊父洪爲武惠皇帝。諸公皆進爲王。以子萇爲大單于。杜洪屯宜秋。其將張琚殺之。自立爲秦王。夏五月。健率師擊琚。斬之。六月。分遣雄。菁。掠關東。援故趙將張遇於許昌。與鎮西將軍謝尚戰於潁水之上。晉師敗績。雄遂以遇歸長安。拜爲司空。

癸丑九年。令公卿以下。歲舉孝廉方正秀才異行各

一人有獻書規諫面陳過失者勿拘貴賤其悉以聞。
初健援張遇納遇繼母韓氏爲昭儀每於衆中謂
遇曰卿吾假子也遇恥之欲滅秦而歸晉夏六月仇
池氏楊初敗秦左衛將軍飛苻雄苻菁以步騎四萬
屯於隴東遇以秦精兵在外與中黃門劉晃謀夜襲
健約晃爲內應啓門會健以事使晃他出晃固辭不
得不及告遇遇不知也引兵至門事覺伏誅健兄子
黃眉出奔晉遇先陰結關中諸豪傑於是孔特起池
陽劉珍夏侯顯起鄠喬秉起雍胡陽赤起司竹呼延
毒起灞城各遣使於征西將軍桓溫中軍將軍殷浩

請援秋九月雄自隴東還長安健使諸將擊之斬特
及劉珍夏侯顯胡陽赤奔呼延毒於灞城雄使苻菁
掠上洛郡於豐陽縣立荊州通關市焉

甲寅十年春二月大司馬桓溫伐秦遣別將入浙川
攻上洛執秦荊州刺史郭敬使司馬勳出子午道以
趨長安健使子萇及苻雄苻菁以五萬衆拒溫於堯
柳城愁思堆夏四月溫大敗秦兵於藍田次於灞上
三輔皆降萇退營城南健以羸兵六千人固守長安
小城遣精銳三萬爲游軍以拒溫苻雄領騎七千與
桓沖戰於白鹿原沖敗復破司馬勳於子午谷勳奔

還漢中。溫初指秦麥爲糧。而秦人芟麥清野。晉軍中大饑。六月。溫遂還師。徙三千餘戶而歸。苻萇復敗之於潼關。丙申。秦丞相東海王雄卒。雄位兼將相。而謙恭汎愛。遵奉法度。朝野安之。健哭之嘔血。曰。天不欲吾平定四海邪。何奪吾元才之速也。以雷弱兒爲丞相。毛貴爲太傅。魚遵爲太尉。苻菁爲司空。置來賓館。起靈臺於杜門。健畱心政事。數延公卿。咨治道。承趙氏苛侈之後。易以寬簡。禮耆老。修儒學。與百姓約法三章。初。健之將入關也。筮之。遇泰之臨。喜曰。小往大來。吉亨。昔往東而小。今還西而大。吉孰大焉。

我其遂定關中乎。及桓溫西伐，關中豪傑喬秉呼延
毒之流，翕然應響。順陽太守薛珍勸溫徑逼長安。北
海王猛被褐來見，秦民咸有貳志。至是，溫敗而歸。裒
擊斬喬秉於雍。王擢復率衆來降，健卑宮薄賦。秦民
莫不歸心焉。冬十月，太子萇卒，爲中流矢也。

乙卯十一年春二月，大蝗自華澤至隴山，食百草，無
遺。牛馬相噉毛，虎狼食人，行路斷絕。大饑霖雨，河渭
皆溢。蒲津監寇登得一履於河，長七尺三寸。先是
新平有長人，長五丈，百姓張靖見之，語靖曰：「苻氏應
受天命，今當太平。」新平令以聞，健以爲妖妄，繫靖於

獄及得巨履、歎曰：「覆載之中，何所不有！」張靖所見其
不虛也。赦之。夏四月，立子生爲太子。六月丙子，
健有疾，司空苻菁作亂，伏誅。乙酉，健薨於太極前殿。
年四十有九。諡曰明皇帝。廟號世宗。子生立。

生字長生，健第三子也。幼無賴，生而無一目。兒童時，
祖洪戲之曰：「吾聞瞎兒一淚，信乎？」生怒，引佩刀自刺，
出血曰：「此亦一淚也。」洪大驚，鞭之。生曰：「性耐刀槊，不
堪鞭捶。」洪曰：「汝爲爾不已，吾將以汝爲奴。」生曰：「可不
如石勒也。」洪以告健，曰：「兒狂悖，乃爾不除，必破汝家。
健將殺之，雄不可乃止。及長，力舉千鈞，手格猛虎，走

及奔馬桓溫入關生單馬掠陣前後十數萇之卒也
強后欲立少子晉王柳健以讖文有三羊五目遂立
生永和十一年六月健薨嗣位大赦改元壽光尊母
強氏爲太后妻梁氏爲后以呂婆樓爲侍中趙俱爲
尚書令苻安爲太尉苻柳爲并州牧鎮蒲坂苻庾爲
豫州牧鎮陝城秋八月中書監胡文及令王魚謂
生曰頻有客星孛於大角熒惑入東井大角爲帝座
東井秦分也於占不出三年國有大喪大臣戮死然
惟修德可以禳災生曰災眚旣見應之則除皇后與
朕對臨天下足塞大喪之變毛太傅梁車騎梁僕射

受遺輔政。不可謂大臣哉。九月。遂殺其弟梁氏及太傅毛貴。車騎尚書令梁楞。左僕射梁安。冬十二月。殺侍中丞相雷弱兒。及其九子二十七孫。弱兒南安羌酋也。剛鯁好直言。生嬖臣趙韶董榮。譖而殺之。生性淫虐。好飲。錘鉗鋸鑿。恆置左右。彎弓露刃。以見羣臣。初。健將強懷與桓溫戰沒。其子延未及封。而健卒。生出游。懷妻樊氏。於道上書。論懷忠烈。請封其子。生怒射而殺之。嘗饗羣臣於太極前殿。飲酣樂。奏生親歌以和之。使尚書令辛牢典勸。旣而怒曰。何不彊酒。因射殺牢。由是百寮無不引滿。昏醉僵仆。以爲樂。

丙辰十二年春正月殺司空王墮。生卽位未幾。自后妃公卿下至僕隸。凡殺五百餘人。二月使征東苻柳參軍閻負梁殊使涼州。涼州稱藩於秦。姚襄攻匈奴堡。殺秦平陽太守苻產。遣使假道。將還隴西。生欲許之。苻堅諫曰。姚襄人傑也。還隴西必爲國害。不如誘以厚利。伺隙而擊之。生遣使拜襄官爵。襄怒曰。旣不假道。何官爵爲。乃斬使者。焚所送章策。寇掠河東。夏四月。長安大風。發屋拔木。宮中或稱賊至。殿門晝閉五日乃已。生推告賊者。殺而剗其心。太后弟左光祿大夫強平切諫。生怒以爲妖言。鑿其頂而殺。

之。太后飲恨而卒。當是時。潼關之西。至於長安。虎狼食人。百姓苦之。皆聚而邑居。爲害滋甚。凡食七百餘人。遂廢農桑。內外兇懼。羣臣請禳之。生曰。野獸饑則食人。飽當自止。終不能頻年爲患也。天豈不子愛羣生。而年年降割。正以百姓多僻。故助朕殺之耳。何禳之有。

丁巳升平元年春二月。有司奏太白犯東井。有暴兵起於京師。生曰。星入井者。必將渴耳。何所怪乎。夏四月。姚襄以衆二萬進據黃洛。生使苻黃眉。苻堅。鄧羌禦之。襄深溝高壘以自固。羌謂黃眉曰。傷弓之鳥。

落於虛發。襄爲桓溫張平所敗。銳氣喪矣。今謀不戰。是窮寇也。然襄性剛狠。若揚旗鼓譟。直壓其營。必忿而出師。可一戰擒也。黃眉從之。使鄧羌率騎三千軍。其壘門。襄果大怒。悉銳出戰。羌僞不勝而走。襄追之。至於三原。羌迴騎拒襄。黃眉與堅亦至。大戰斬之。襄弟萇帥其衆降。黃眉等還長安。生不加賞。反於衆中辱之。黃眉怒。謀弑之。事發伏誅。王公親戚多有死者。光祿大夫牛夷懼不免。請出鎮上洛。生曰。卿忠肅篤敬。宜左右朕躬。改授中軍。夷懼歸而自殺。初生夢大魚食蒲。又長安謠曰。東海大魚化爲龍。男便爲王。

女爲公。問在何所。洛門東。東海苻堅封也。時爲龍驤將軍。第在洛門之東。而侍中太師魚遵第亦在焉。生以謠故殺遵。及其七子十孫。殘虐日甚。耽酒無復晝夜。羣臣朔望朝謁。罕有見者。或至暮方出。臨朝輒怒。惟行殺戮。左右或言天下歌咏太平。則曰媚我也。殺之。或言陛下刑罰微過。則又曰謗我也。殺之。所幸妃嬪少忤卽殺。流其尸於渭水。使宮人與男子裸交殿前。生剝牛羊驢馬雞犬豚鷺。三五十爲羣。放之殿中。或剝死囚面皮。令其歌舞。引羣臣觀之。以爲嬉樂。宗室勲舊殺戮略盡。王公在位者。悉以疾告歸。人情危